

Na osnovu člana 13. Zakona o principima lokalne samouprave Federacije Bosne i Hercegovine ("Službene novine Federacije BiH", broj 49/06 i 51/09), člana 23., 55. i 104 Statuta Općine Ilijaš, prečišćeni tekst ("Službene novine Kantona Sarajevo", broj: 20/09 i 46/18) i člana 99. Poslovnika Općinskog vijeća Ilijaš ("Službene novine Kantona Sarajevo", broj: 2/10 i 18/15), Općinsko vijeće Ilijaš na svojoj redovnoj 25. sjednici održanoj 28. novembra 2018.godine, donijelo je:

## **PRAVILNIK**

### **o uvjetima, načinu i postupku dodjele sredstava iz transfera za mobilnost mladih Općine Ilijaš**

#### **I OPĆE ODREDBE**

##### **Član 1.**

(Predmet Pravilnika)

Ovim Pravilnikom propisuju se uvjeti, način i postupak dodjele sredstava iz transfera za mobilnost mladih, te prava i obaveze korisnika finansijskih sredstava za mobilnost mladih Općine Ilijaš.

##### **Član 2.**

(Definicije)

Pod pojmom "mobilnost mladih" u smislu ovog Pravilnika smatra se učešće mladih na:

1. regionalnim i međunarodnim edukacijama, radionicama i seminarima;
2. regionalnim i međunarodnim konferencijama i kongresima;
3. kratkoročni i srednjoročni posjeti u svrhu rada na projektu/istraživanju ili uspostavljanju saradnje na realizaciji projekata od značaja za lokalnu zajednicu;
4. stručnom usavršavanju/praksi;
5. regionalnim i međunarodnim školama koje promovišu neformalno obrazovanje, volonterizam i humanitarni rad;
6. takmičenjima iz oblasti formalnog obrazovanja i kulture;
7. studijskim posjetama u cilju razvoja regionalne i međunarodne saradnje među mladima.

Pod pojmom "mladi" u smislu ovog Pravilnika smatraju se osobe u životnoj dobi od navršanih 15 do navršanih 30 godina starosti, prema Članu 4. (stav 1) Zakona o mladima Federacije Bosne i Hercegovine.

##### **Član 3.**

(Sredstva za provođenje)

Sredstva za mobilnost mladih obezbjeđuju se u Budžetu Općine Ilijaš.

Sredstva se mogu obzbižediti i od drugih institucija vlasti u Bosni i Hercegovini, iz inostranih fondova, od međunarodnih organizacija i drugih donatora iz Bosne i Hercegovine i inostranstva.

##### **Član 4.**

(Troškovi koji se mogu finansirati)

Finansijska sredstva iz Transfera za mobilnost mladih dodjeljivat će se isključivo za finansiranje sljedećih troškova:

1. putovanja (troškovi goriva, autobuske, avionske ili druge putne karte);
2. kotizacije (troškovi učešća na edukacijama, radionicama, seminarima, konferencijama i sl.);
3. boravka (smještaj i hrana) i
4. vize.

Korisnik sredstava je dužan dostaviti dokaz da organizator aktivnosti nabrojanih u članu 2. Pravilnika neće pokrivati putne troškove, troškove kotizacije, troškove vize i boravka.

### **Član 5.**

(Iznosi sredstava koja mogu biti odobrena)

Maksimalni iznos nepovratnih sredstava u jednoj godini, za jednu osobu iznosi:

- do 200,00 KM za putne troškove, troškove kotizacije i boravka u svrhu aktivnosti koje se odvijaju unutar Bosne i Hercegovine;
- do 400,00 KM za putne troškove, troškove kotizacije i boravka u svrhu aktivnosti koje se odvijaju u zemljama regiona: Hrvatska, Srbija, Slovenija, Makedonija i Crna Gora;
- do 600,00 KM za putne troškove, troškove kotizacije, troškove vize i boravka u svrhu aktivnosti koje se odvijaju ostalim ne pomenutim zemljama.

Nepovratna sredstva se uplaćuju na bankovni račun aplikanta.

Pravo na dodjelu nepovratnih sredstava pojedinac može ostvariti samo jednom u toku jedne budžetske godine.

## **II KRITERIJI ZA DODJELU SREDSTAVA**

### **Član 6.**

(Pravo na dodjelu nepovratnih sredstava)

Pravo na dodjelu nepovratnih sredstava iz Transfera za mobilnost mladih mogu ostvariti pojedinci, učenici i studenti koji se nalaze na redovnom ili vanrednom školovanju u osnovnim, srednjim i visokoškolskim ustanovama, nezaposlene mlade osobe, aktivisti, članovi, volonteri nevladinih organizacija uz ispunjavanje sljedećih uslova:

- da su državljani Bosne i Hercegovine;
- da imaju prebivalište na području općine Ilijaš duže od 3 (tri) godine.

### **Član 7.**

(Neophodna dokumentacija uz zahtjev)

Uz popunjen obrazac zahtjeva, aplikant je obavezan dostaviti sljedeću dokumentaciju (original ili ovjerenu fotokopiju):

1. Izvod iz matične knjige rođenih;
2. Uvjerenje o državljanstvu;
3. Uvjerenje o kretanju;
4. Dokaz: poziv za učešće ili potvrdu o učešću u aktivnosti iz Člana 2. ovog Pravilnika;
5. Potvrda o redovnom školovanju za učenike i studente;
6. Uvjerenje Službe za zapošljavanje za nezaposlene;
7. Motivaciono pismo;
8. Dokaz ili potvrda o angažmanu u organizaciji/udruženju (ukoliko postoji);
9. Dokaz o ostvarenom uspjehu u formalnom obrazovanju (svjedočanstva ili fotokopija indeksa);

10. Dokaz o ostvarenim rezultatima na općinskim, kantonalnim, federalnim, državnim ili međunarodnim takmičenjima (ukoliko postoji);
11. Podaci o bankovnom računu.

#### **Član 8.**

(Dokumentacija koja se boduje)

Prijavljeni kandidati bodove stižu na osnovi:

1. motivacionog pisma za učešće u aktivnosti iz Člana 2. ovog Pravilnika;
2. omladinskog aktivizma i volontiranja (angažman u omladinskom, humanitarnom, kulturnom ili sličnom udruženju/organizaciji);
3. ostvarenog uspjeha u formalnom obrazovanju;
4. ostvarenog uspjeha na općinskom, kantonalnom, federalnom, državnom ili međunarodnom takmičenju.

Zahtjevi za dodjelu sredstava vrjednuju se prema broju ostvarenih bodova, uz uslov da je uz zahtjev dostavljena sva neophodna dokumentacija. Dostavljena dokumentacija boduje se u rasponu od 1 do 5 bodova.

#### **Član 9.**

(Aktivnosti koje se neće finansirati)

Finansijskim sredstvima iz Transfera za mobilnost mladih neće se finansirati troškovi putovanja i učešća u aktivnostima vezanima za političke stranke u i van Bosne i Hercegovine koje organizuju domaće i inostrane političke stranke.

### **III POSTUPAK DODJELE SREDSTAVA**

#### **Član 10.**

(Izbor korisnika sredstava)

Finansijska sredstva iz Transfera za mobilnost mladih dodjeljivat će se tokom cijele godine, a na osnovi zahtjeva aplikanata.

U prvih 6 mjeseci, zaključno sa 30. junom tekuće godine, iz transfera za mobilnost mladih može se dodjeliti 50% nepovratnih sredstava od ukupno planiranih namjenskih sredstava za tu budžetsku godinu.

Postupak ocjenjivanja i izbora korisnika finansijskih sredstava vršit će Služba za društvene djelatnosti i poslove mjesnih zajednica Općine Ilijaš u skladu sa kriterijima propisanim Članom 8. ovog Pravilnika.

#### **Član 11.**

(Rokovi)

Zahtjev za dodjelu finansijskih sredstava potrebno je dostaviti najmanje 15 dana prije realizacije aktivnosti iz Člana 2. Pravilnika.

Služba za društvene djelatnosti i poslove mjesnih zajednica dužna je u roku od 15 dana od dana podnošenja zahtjeva, obavijestiti aplikanta o svojoj odluci te je istu dužna obrazložiti.

### **IV DOSTAVLJANJE DOKUMENTACIJE**

#### **Član 12.**

(Podnošenje zahtjeva)

Obrazac Zahtjeva za dodjelu finansijskih sredstava iz Transfera za mobilnost mladih preuzima se na Info pultu Općine Ilijaš.

Cjelokupna dokumentacija dostavlja se na protokol Općine Ilijaš uz obaveznu naznaku "Služba za društvene djelatnosti i poslove mjesnih zajednica Općine Ilijaš – Zahtjev za dodjelu sredstava za mobilnost mladih".

## V PRAVA I OBAVEZE KORISNIKA SREDSTAVA

### Član 13. (Ugovor)

Aplikant kojem su odobrena sredstava iz Transfera za mobilnost mladih potpisuje Ugovor sa Općinom Ilijaš, kojim će se regulirati prava i obaveze vezano za dodjelu novčanih sredstava za mobilnost mladih.

Ugovor o dodjeli sredstava za mobilnost mladih sadrži: naziv ugovorenih strana, podatke o aplikantu, tačan naziv aktivnosti za koju su sredstva dodjeljena, visinu i način isplate sredstava te druga prava i obaveze ugovornih strana.

Aplikant kojem se dodjele sredstva, po potrebi će Službi za društvene djelatnosti i poslove mjesnih zajednica Općine Ilijaš dostaviti dodatne administrativne podatke neophodne za izradu ugovora i transfer sredstava.

Korisnik sredstava dužan je u roku od 30 dana, od dana završetka aktivnosti iz Člana 2. ovog Pravilnika nadležnoj Službi dostaviti narativni i finansijski izveštaj o namjenskom utrošku sredstava. Obrazac za izvještaj o utrošenim sredstavima preuzima se u Službi za društvene djelatnosti i poslove mjesnih zajednica Općine Ilijaš.

Korisnik sredstava koji nije opravdao namjenski utrošak sredstava, više neće moći koristiti sredstva iz transfera za mobilnost mladih.

### Član 14. (Ravnopravnost polova)

Gramatička terminologija korištena u ovom Pravilniku podrazumjeva uključivanje oba pola.

## VI PRIJELAZNE I ZAVRŠNE ODREDBE

### Član 15. (Stupanje Pravilnika na snagu)

Ovaj Pravilnik stupa na snagu danom objave u "Službenim novinama Kantona Sarajevo".

Broj: 01/1-02-2611-13/18  
Ilijaš, 28.11.2018. godine

ZAMJENIK PREDSDJEDAVAJUĆEG  
OPĆINSKOG VIJEĆA ILIJAŠ

Alen Hasković, MA šum.